

PAS cadang tubuhkan Suruhanjaya Bebas Post Mortem PRU13
Malaysian Insider
June 7, 2013
Oleh Mohd Farhan Darwis

KUALA LUMPUR, 7 Jun — PAS hari ini menggesa diwujudkan Suruhanjaya Bebas Post Mortem PRU13 bagi menyiasat segala dakwaan salah laku ketika Pilihan Raya 2013 lalu.

Presiden PAS Datuk Seri Abdul Hadi Awang menegaskan dengan meletakkan Suruhanjaya Pilihan Raya (SPR) di bawah Parlimen, ia memberi gambaran pengendali pilihan raya itu masih tidak telus dan wujud keperluan mewujudkan post-mortem berkenaan Pilihan Raya 2013.

"Hakikatnya ialah semua pihak dari Pakatan Rakyat, NGO, dan individu rakyat Malaysia, termasuklah dari parti Barisan Nasional sendiri juga mengakui bahawa wujudnya banyak kelemahan yang boleh diperbaiki dalam menguruskan PRU sebagai pelengkap kepada sistem demokrasi yang diamalkan di Malaysia," kata Abdul Hadi (gambar) dalam satu kenyataan hari ini.

Abdul Hadi menegaskan keperluan post-mortem berkenaan adalah bagi mencari permasalahan pokok yang timbul sebelum sebarang pembaharuan dilaksanakan.

"Tindakan untuk meletakkan SPR di bawah Parlimen tidak mempunyai apa-apa erti sekiranya kita tidak tahu punca permasalahan yang timbul.

"Hanya setelah kelemahan-kelemahan ini diketahui baharulah perbaikan secara menyeluruh dapat dilakukan," tegasnya lagi.

Menurut Abdul Hadi, Suruhanjaya Bebas Post Mortem PRU13 yang boleh menyiasat secara terbuka dan telus bagi mendapat maklumat kelemahan, salah laku, kepincangan dari semua pihak.

Sejak pengumuman keputusan Pilihan Raya Umum ke-13 lalu Pakatan Rakyat (PR) menolak keputusannya dengan mengadakan bantahan di seluruh negara melalui Himpunan Black 505.

Penganjurnya, Datuk Johari Abdul turut berkata himpunan berkenaan akan terus dijalankan walaupun Yang Di-Pertuan Agong telah menitahkan agar setiap rakyat menerima keputusan pilihan raya.

Perdana Menteri Datuk Seri Najib juga sebelum ini mengumumkan SPR akan diletakkan di bawah seliaan Jawatankuasa Khas Pilihan Parlimen (PSC) sekaligus bagi meningkatkan imej pengendali pilihan raya tersebut.

Cadangan itu bagaimanapun dikritik pembangkang yang mahukan Pengerusi SPR Tan Sri Abdul Aziz Mohd Yusof dan timbalannya Datuk Wan Ahmad Wan Omar melepaskan jawatan mereka kerana dituduh tidak kompeten.

Ketua Pembangkang Datuk Seri Anwar Ibrahim berkata penyertaan wakil pemimpin PR dalam PSC mengenai penambahbaikan SPR juga tidak akan berlaku sehingga pengerusi dan timbalan pengerusi SPR meletakkan jawatan.

"Barang rompak itu serah dulu, baru kita cerita," kata Anwar merujuk kepada penipuan yang berlaku dalam pilihan raya 5 Mei lalu.

"SPR perlu letak jawatan, tidak kompeten, jangan cuba menipu lagi seperti kes selepas Bersih, buat PSC, kemudian menipu kami lagi," tegasnya.

Hakcipta © 2013 The Malaysian Insider

Source:

<http://www.themalaysianinsider.com/bahasa/article/pas-cadang-tubuhkan-suruhanjaya-bebas-post-mortem-pru13/>